

摘藻堂四庫全書薈要

集部

欽定四庫全書薈要

集部

徐孝穆集卷六

詳校官原任編修臣徐立綱



欽定四庫全書薈要卷一萬三千五百三十五

集部

徐孝穆集卷六

陳 徐陵 撰

詔

陳武帝即位詔

世宗  
勅

更運帝王所以御天三正相因夏殷所以宰世雖

色分辭翰時異文質揖讓征伐迄用參差而育德振民  
義同一揆朕以寡昧時屬艱危國步屢屯天維三絕肆  
勤先后拯厥橫流藉將帥之功兼猛士之力一匡天下

再造黔黎梁氏以天祿永終歷數攸在遵與能之典集  
大命於朕躬顧惟菲德辭不獲亮式從天睠俯協民心  
受終文祖升禋上帝繼迹百王君臨萬宇若涉川水罔  
知攸濟寶業初建皇祚維新思俾惠澤覃被億兆可大  
赦天下改梁太平二年為永定元年賜民爵二級文武  
二等鰥寡孤獨不能自存者人穀五斛逋租宿債皆勿  
復收其有犯鄉里清議贓污淫盜者皆洗除先注與之  
更始長徒敕繫特皆原之亡官失爵禁錮奪勞一依舊

典

梁禪陳詔

五運更始三正迭代司牧黎庶是屬聖賢用能經緯乾坤彌綸區宇大庇黔首闡揚鴻烈草晦以明積代同軌百王踵武咸由此則梁德湮微禍亂薦發太清云始見困長蛇承聖之季又罹封豕爰至天成重竊神器三光亟沈七廟乏祀含生已泯鼎命斯墜我武元之祚有如綴旒靜惟屯剝夕惕載懷相國陳王有命自天降神維

嶽天地合德晷耀齊明拯社稷之橫流提億兆之塗炭  
東誅逆叛北殲獯醜威加四海仁漸萬國復張崩樂重  
興絕禮儒館聿脩戎亭虛候大功在舜盛績惟禹巍巍  
蕩蕩無得而稱來獻白環豈直皇虞之世入貢素雉非  
止隆周之日固以效珍川陸表瑞煙雲甘露醴泉旦夕  
凝涌嘉禾芝草孳植郊甸道昭於悠代勲格於皇穹明  
明上天光華日月草故著於玄象代德彰於圖讖獄訟  
有歸謳歌爰適天之厯數實有攸在朕惟庸藐闔於古

昔永稽崇替為日已久敢忘列代之遺典人祇之至願  
乎今便遜位別宮敬禪於陳一依唐虞宋齊故事

陳公九錫詔

肇昔元胎剖判太素氤氳崇建人皇必憑洪宰故賢哲  
之后牧伯征於四方神武之君大監治乎萬國又有一  
匡九合渠門之賜以隆戮帶圍溫行宮之寵斯茂時危  
所以貞固運泰所以光熙斯乃千載同風百王不刊之  
道也太傅義興公允文允武乃聖乃神固天生德康濟

黔首昔在休期早隆朝寄遠踰滄海大拯交越皇運不  
造書契未聞中國其亡兵凶總至哀哀噍類譬彼窮宇  
悠悠上天莫云斯極否終則泰元輔應期救此將崩援  
茲已溺乘舟履輦架險浮深經畧中塗畢殲羣醜泊乎  
石頭姑孰流髓履腸一朝指撝六合清晏是用光昭下  
武翼亮中都雪三后之勅讎夷三靈之巨慝堯台禹佐  
未始能階殷相周師固非云擬重之以屯剝餘象荆楚  
大崩天地無心乘輿委御五湖薦食競謀諸夏八方蒸



跼莫有匡救強臣放命黜我沖人顧影於荼孺之魂甘心於甯卿之辱却案下髻求哀之路莫從竊鉄逃責容身之地無所公神兵奄至不日清澄惟是辱蒙再膺天錄斯又巍巍蕩蕩無得而稱焉加以仗茲忠義屠彼妖逆震部夷氛稽山罷祲番禺蠡澤北鄙西郊殲厥凶徒罄無遺種斯則兆民之命修短所縣率土之基興亡是賴於是刑禮兼訓沿革有章中外成平遐邇寧一用能使陽光合魄曜象呈暉棲閣遊庭抱仁含信宏勲該於

厚地大道格於玄天義農炎昊以來卷領垂衣之世聖人濟物未有如斯者也夫備物典策桓文是膺助理陰陽蕭曹不讓未有功高於寓縣而賞薄於伊周凡厥人祇固懷延佇實由公謙撝自牧降損為懷嘉數遲回永言增歎豈可申茲雅尚久廢朝猷宜戒司勲敬升鴻典且重華大聖媯汭惟賢盛德之祀無忘公侯之門必復是以殷嘉亶父繼后稷之官堯命羲和纂重黎之位況其本支攸建宜誓山河者乎其進公位相國總百揆封十

郡為陳公備九錫之禮加璽紱遠遊冠綠紱綬位在諸侯王上其鎮衛大將軍揚州牧如故

進武帝為長城公詔

德懋懋官功懋懋賞皇王盛則所謂元龜司空公南徐州刺史長城縣開國侯諱志華寅亮風度弘遠體文經武明允篤誠曩者率五嶺之強兵誅四海之讐敵固以勒功彝鼎書勲太常克定京師勤勞自重自鎮撫粉榆永寧豐沛東涼既息北蔡無歸代馬燕犀

闕

糧坐甲固敵是求方欲大討於秦嶺敦脩於輿睦協謀  
上相爰納朕躬思所以敬答忠勲用申朝典可進爵為  
長城縣公

陳文帝登祚尊皇太后詔

朕以虛薄才非弘濟竊守藩維常懷盈滿豈圖蒼昊不  
弔國步艱難皇嗣元良藐在崑渭二臣奉迎川塗靡從  
六傳還朝淹留永日今國圖無主家業事隆上奉父母  
之嚴規下逼羣臣之廷諍遂以庸質升纂帝基對揚大

化彌增號懼今宜式遵舊則奉上皇后尊號為皇太后  
御慈訓宮一依前典若中流靜晏皇嗣歸來輒當解紱於  
箕山之陽歸老於琅邪之國復子明辟還承寶圖若問  
與夷無媿園寢

封始興王詔

漢祖天倫伯叔迨封晉元世系琅邪傳國仰惟二后重  
光率由前典朕昔因藩次蒙繼本宗分在要荒久離寒  
燠天嘉紹祚別命皇枝歸自嶠函禮隔登獻每至霜庭

可履矚垣寢而懷悲風樹鳴條望章陵而增感今嗣王  
乖德獲罪慈訓永言主奠宜自朕躬但國步時艱皇基  
務切復奉家業升纂帝圖重違情禮言深哽慟可以第  
二皇子叔陵為始興王

文

為陳武帝即位告天文

皇帝臣諱敢用玄牡昭告於皇皇后帝梁氏以圯剝薦  
臻歷運有極欽若天應以命於諱夫肇有烝民乃樹司

牧選賢與能未常厥姓放勳重華之世咸無意於受終  
當塗典午之君雖有心於揖讓皆以英才處萬乘高勛  
御四海故能大庇黔首光宅區縣有梁末運仍葉邁屯  
獯醜憑陵久移神器承聖在外非能祀夏天未悔禍復  
罹寇逆嫡嗣廢黜宗支僭詐天地蕩覆紀綱泯絕諱爰  
初投袂大拯橫流重舉義兵實戡多難廢王立帝實有  
厥功安國定社用盡其力是謂小康方期大道既而煙  
雲表色日月呈瑞緯聚東井龍見譙邦除舊布新既彰

玄象遷虞事夏且協謳歌九域八荒同布哀歎百神羣  
祀皆有誠願梁帝高謝萬邦授以大寶諱自惟菲薄讓  
德不嗣至於再三辭勿獲許僉以百姓須主萬幾難曠  
皇靈眷命非可謙拒畏天之威用膺嘉祚永言夙志能  
無慙德敬簡元辰升壇受禪告類上帝用荅民心永保  
於我有陳惟明靈是饗

梁禪陳策文

咨爾陳王惟昔上古厥初生民驪連粟陸之前容成大



庭之代竝結繩寫鳥杳冥慌忽故靡得而詳焉自羲皇  
軒昊之君陶唐有虞之主或垂衣而御四海或無為而  
子萬姓居之如馭朽索去之如脫敝屣裁遇許由便能  
捨帝暫逢善卷即以讓王故知玄扈璇璣非闕尊貴金  
根玉輅示表君臨及南觀河渚東沈刻壁精華既竭耄  
勤已倦則抗首而笑惟賢是與謗然作歌簡能斯授遺  
風餘烈昭晰圖書漢魏因循是為故實宋齊授受又弘  
斯義我高祖應期撫運握樞御宇三后重光祖宗齊聖

及時屬陽九封豕薦食西都失馭夷狄交侵乃臬天成

輕弄龜鼎慄慄黔首若崩厥角徽徽皇極將甚綴旒惟

王乃聖乃神欽明文思二儀並運四時合序天錫智勇

人挺雄傑珠庭日角龍行虎步爰初投袂日乃勤王電

掃番禺雲撤彭蠡揃其元惡定我京畿及王賀帝弘質

茲冠履既行伊霍用保沖人震澤稽陰並懷叛逆獯羯

醜虜三亂皇都裁命偏師二邦自奠薄伐玁狁六戎盡

殪嶺南叛換湘郢結連賊帥既擒兇渠傳首用能百揆

時序四門允穆無思不服無遠不届上達穹昊下漏淵  
泉蛟魚並見謳歌攸屬況乎長彗橫天已徵布新之兆  
璧日斯既實表更姓之符是以始創義師紫雲曜彩肇  
惟尊主黃龍負舟楛矢素翬梯山以至白環玉玦慕德  
而臻若夫安國字氓本因萬物之志時乘御宇良會樂  
推之心七百無常期皇王非一族昔木德既季而傳祚  
於我有梁天之厯數允集明哲式遵前典廣詢羣議王  
公卿尹莫不攸屬敬從人祇之願授帝位於爾躬四海

困窮天祿永終王其允執厥中軌儀前式以副溥天之  
望禋祀上帝時膺大禮永固洪業豈不盛歟

陳公九錫文

大哉乾元資日月以貞觀至哉坤元憑山川以載物故  
惟天為大陟配者欽明惟王建國翼輔者齊聖是以文  
武之佐礪谿蘊其玉璜堯舜之臣滎河鏤其金版況乎  
體得一之鴻姿寧陽九之危厄拯橫流於碣石撲燎火  
於崑岑驅馭於韋彭跨蹠於齊晉神功行而靡用聖道

運而無名者乎今將授公典策其敬聽朕命日者昊天  
不弔鍾亂於我國家網漏吞舟強胡內崩茫茫宇宙慄  
慄黎元方足圓顱萬不遺一太清否亢橋山之痛已深  
大寶屯如平陽之禍相繼上宰膺運康救兆民鞠旅於  
滇池之南揚旌於桂嶺之北懸三光於已墜謚四海於  
羣飛屠禦窳於中原斲鯨鯢於濛汜蕩寧上國光啟中  
興此則公之大造於皇家者也既而天未悔禍夷醜薦  
臻南夏崩騰西京蕩覆羣胡孔熾藉亂乘間推納藩枝

盜假神器冢司昏撓旁引寇讐既見貶於桐宮方謀危  
於漢閣皇運已殆何殊贅旒中國搖然非徒如綫公赫  
然投袂匡救本朝復莒齊都平戎王室朕所以還膺寶  
厯重履宸居挹建武之風猷歌宣王之雅頌此又公之  
再造於皇家者也公應務之初登庸惟始三川五嶺莫  
不窺臨銀洞珠宮所在寧謐孫盧肇釁越貊為災番郡  
阡危勢將淪殄公赤旗所指妖壘洞開白羽纒撓兇徒  
紛潰非其神武久喪南藩此又公之功也大同之末邊

政不脩李賁狂迷竊我交愛敢稱大號驕恣甚於尉佗  
據有連州雄豪熾於梁碩公英謨雄算電掃風行馳御  
樓船直跨滄海新昌典澈備歷艱難蘇歷嘉寧盡為京  
觀三山獠洞八角蠻陬逝矣水寓之鄉悠哉火山之國  
馬援之所不屆陶璜之所未開莫不懼我王靈爭朝邊  
候歸琛天府獻狀鴻臚此又公之功也自寇虜陵江宮  
闈幽辱公枕戈嘗膽提劍撫心氣涌青霄神飛紫闥而  
番禺連率本自諸夷言得其朋是懷同惡公仗此忠誠

乘機勦定執沛令而釁鼓平新野而據鞍此又公之功也世道初艱方隅多難勦門桀黠作亂衡疑兵切池隍衆兼夷獠公以國盜邊警知無不為恤是同盟誅其醜類莫不魚驚鳥散面縛頭懸南土黔黎重保蘇息此又公之功也長驅嶺嶠夢想京畿緣道首豪遞為榛梗路養渠率全據大都蓄聚逋逃方謀阻亂百樓不戰雲梯之所未窺萬弩齊張高輶之所非敵公龍驤虎步嘯吒風雲山靡堅城野無強陣清妖氛於瀕石滅沴氣於雲



都此又公之功也遷仕凶慝屯據大臯乞活類馬騰之  
軍流民多杜弼之衆推鋒轉鬪自北徂南頻歲稽誅實  
惟勅虜公坐揮三略遙制六竒義勇同心貌貅騁力雷  
奔電掣谷靜山空列郡無犬吠之警叢祠罷狐鳴之盜  
此又公之功也王師討虜次屆淪波兵乏兼儲士有飢  
色公回麾蠡澤積穀巴邱億庾之詠斯豐壺漿之迎是  
衆軍民轉漕曾無砥柱之難舳艫相望如運菽倉之府  
犀渠貝冑顧蔑雷霆高艦層樓仰捫霄漢故使三軍勇

銳百戰無前承此兵糧遂殄兇逆此又公之功也若夫  
英圖邁俗義旅如雲湓壘猜攜用淹戎略公志惟同獎  
師克在和鵠塞非虞鴻門是會若晉侯之誓白水如蕭  
王之推赤心屈體交盟人祇感咽故使舟師並路遠邇  
同心此又公之功也姑孰襟要嶠函阻憑寇虜據其關  
梁大盜負其扁鑄公一校裁撓三雄並奮左賢右角沙  
潰土崩木甲殪於中原糧表赴於江水他他藉藉萬計  
千羣鄂坂之隘斯開夷庚之道無塞此又公之功也義

軍大衆俱集帝京逆豎兇徒猶屯皇邑若夫表裏山河  
金湯險固䟽龍首以抗殿掬華岳以為城雜虜憑焉強  
兵自若公回茲地軸抗此天羅曾不崇朝俾無遺噍軍  
容甚穆國政方脩物重覩於衣冠民還瞻於禮樂楚人  
滿道爭覩於葉公漢老銜悲俱歡於司隸此又公之功  
也內難初靖諸侯出關外郡傳烽鮮卑犯塞莫非且渠  
當戶中貴名王冀馬迺於淮南胡笳動於徐北公舟師  
步甲亘野橫江殲厥羣獍遂殫封豨莫不絰木而止戎

車靡遺遇濼而還歸驂盡殪此又公之功也公克黜禍  
難劬勞皇室而孫甯之黨翻啓狄心伊洛之間咸為虜  
戍雖金陵佳氣石壘天嚴朝暗戎塵夜喧胡鼓公三籌  
既畫八陣斯張裁舉靈鈺亦抽金僕咸俘醜類悉反高  
墉異李廣之皆誅同龐元之盡赦此又公之功也任約  
叛換梟聲不悛戎羯貪婪狼心無改穹廬羶幕抵北闕  
而為營烏孫天馬指東都而成陣公左甄右落箕張翼  
舒埽是欃槍驅其獫狁長狄之種埋於國門椎髻之酋

烹於軍市投秦坑而盡沸噎灘水而不流此又公之功也一相居中自折彝鼎五湖小守妄懷同惡公夙駕兼道秉羽杖戈玉斧將揮金鉦且戒妖酋震懾遽請灰釘爇櫬以表其含弘焚書以安其反側此又公之功也賊龕兇橫陵虐具區阻兵安忍憑災怙亂自古蟲言鳥迹混沌洪荒凡或虔劉未此殘酷公雖宗居汝潁世寓東南育聖誕賢之鄉含章挺生之地眷言桑梓公私憤切卓爾英狀承規奉筭戮此大憝如烹小鮮此又公之功

也亂離永久羣盜孔多浙左兇渠連兵構逆豈止千兵  
五校白雀黃龍而已哉公以中軍無率選是親賢奸寇  
途窮灌然冰泮刑澹之所文命動其大威雷門之間句  
踐行其嚴戮英規聖迹異代同風此又公之功也同姓  
有扈頑凶不賓憑藉宗盟圖危社稷觀兵匯澤勢震京  
師驅率南蠻已為東帝公論兵於廟堂之上決勝於樽  
俎之間寇賈樊滕浮江下瀨一朝搦撲無待甸師萬里  
澄清非勞新息此又公之功也豫章妖寇依憑山澤繕

甲完聚多歷歲時結從連橫爰洎交廣呂嘉既獲吳淠  
已縱命我還師征其不恪連營盡拔偽黨斯擒曜聖武  
於匡山回神旌於蠡派此又公之功也自八紘九野瓜  
剖豆分竊帝偷王連州比縣公武靈已暢文德又宣折  
簡馳書風猷斯遠至於蒼蒼浴日杳杳無雷北洎丈夫  
之鄉南踰女子之國莫不屈膝膜拜求吏款關此又公  
之功也京師禍亂亟積寒暄雙闕低昂九門寥豁寧秦  
宮之可顧豈魯殿之猶存五都簪弁百僚御士胡服縵

纓咸為戎俗高冠厚履希復華風宗微子麥穗之歌周  
大夫黍離之歎方之於斯未足為悲矣公求衣昧旦晨  
食高春興構宮闈具瞻遐邇膠庠宗稷之典六符十等  
之章還聞泰始之風流重覩永平之遺事此又公之功  
也公有濟天下之勲重之以明德凝神體道合德符天  
用百姓以為心隨萬幾而成務恥一物非唐虞之民歸  
含靈於仁壽之域上德不德無為以為夏長春生顯仁  
藏用忠信為寶風雨弗憊仁惠為基牛羊勿踐功成治



定樂奏咸雲安上治民禮兼文質物色邱園衣裾里巷  
朝多君子野無遺賢菽粟同水火之饒工商富狩頓之  
旅是以天無蘊寶地有呈祥滴露御雲朝團曉映山車  
澤馬服御登閑既景煥於圖書方歲蕤於史牒高勳踰  
於象緯積德冠於嵩華固無得而稱者矣朕又聞之前  
王宰世茂賞尊賢式樹蕃長總征羣伯二南宗絕四履  
遐曠泱泱表海胙土惟齊巖巖泰山俾侯於魯抑又勤  
王反鄭夾輔遷周召伯之命斯隆河陽之禮咸備況復

經營宇宙豈惟斷鼇足之功弘濟蒼生非直鑿龍門之險而酬庸報德寂爾無聞朕所以垂拱當宇載懷慙悸者也今授公相國以南豫州之陳留南丹陽宣城揚州之吳興東陽新安新寧南徐州之義興江州之鄱陽臨川十郡封公為陳公錫茲青土苴以白茅爰定爾邦用建冢社昔旦奭分陝俱為保師晉鄭諸侯咸作卿士兼其內外禮實攸宜今命使持節兼太尉王通授相國印綬陳公璽綬使持節兼司空王瑒授陳公茅土金虎符

第一至第五左竹使符第一至第十相國秩踰三鉉任  
總百司位絕朝班禮由事革其以相國總百揆除錄尚  
書之號上所假節侍中貂蟬中書監印章中外都督太  
傅印綬義興公印策其鎮衛大將軍揚州牧如故又加  
公九錫其敬聽後命以公禮為楨榦律等銜策四維皆  
舉八柄有章是用錫公大輅戎輅各一玄牡二駟以公  
賤寶崇穀疏爵待農室富京坻民知榮辱是用錫公衮  
冕之服赤烏副焉以公調理陰陽燮諧風雅三靈允降

萬國同和是用錫公軒縣之樂六佾之舞以公宣導王  
猷弘闡風教光景所照鞮象必通是用錫公朱戶以居  
以公抑揚清濁褒德進賢髦士盈朝幽人虛谷是用錫  
公納陛以登以公巖然廊廟為世鎔範折衝四表臨御  
八荒是用錫公武賁之士三百人以公執茲明罰期在  
刑措象恭無赦干紀必誅是用錫公斧鉞各一以公英  
猷遠量跨厲嵩溟混一車書括囊寰宇是用錫公彤弓  
一彤矢百旅弓十旅矢千以公天經地義貫徹幽明春

露秋霜允恭染盛是用錫公秬鬯一卣圭瓚副焉陳國  
置丞相已下一遵舊式往欽哉其恭循朕命克相皇天  
弘建邦家允興洪業以光我高祖之休命

璽書

陳武帝下州郡璽書

夫三正草代商周所以應天五勝相推軒義所以當運  
梁德不造喪亂積年東夏奔騰西都蕩覆蕭勃干紀非  
惟趙倫侯景滔天踰於劉載貞陽反篡賊約連兵江左

累屬於鮮卑金陵久非於梁國自有氤氲混沌之世龍  
圖鳳紀之前東漢興平之初西朝永嘉之亂天下分崩  
未有若於梁朝者也朕以虛薄屬當興運自昔登庸首  
清諸越徐門浪泊靡不征行浮海乘山所在戡定冒遡  
風塵騁馳師旅六延梁祀十翦強寇豈曰人謀皆由天  
啓梁氏以天祿斯改期運永終欽若唐虞推其鼎玉朕  
東西退讓拜手陳辭避舜子於箕山之陽求友伯於滄  
洲之野而公卿敦逼率土翹惶天命難稽遂享嘉祚今

月乙亥升禮太壇言念遷桐但有慙德自梁氏將末頻  
月亢陽火運斯終秋霖奄降翌日成禮圓丘宿設埃雲  
晚霽星象夜張朝景重輪泣三危之膏露晨光合璧帶  
五色之卿雲顧惟寡薄彌慙休祉昧旦丕顯方思致治  
卿等擁旌方岳相任股肱剖符名字方寄恤隱王厯維  
新念有欣慶想深求民瘼務在廉平愛惠以撫孤貧威  
刑以禦強猾若有萑蒲之盜或犯戎商山谷之首擅強  
幽險皆從肆赦咸使聞知如或迷途俾在無貸今遣使

人具宣往旨念思善政副此虛懷

梁禪陳璽書

君子者自昭明德達人者先天弗違故能進退咸亨動  
靜元吉朕雖蒙寡庶乎景行何則三才剖判九有區分  
情性相乖亂離云起是以建彼司牧推乎聖賢授受者  
任其時來皇王者本非一族人謀是與屈已從萬物之  
心天意斯歸鞠躬奉百靈之命謳歌所往則攘袂以膺  
之菁華已竭乃褰裳而去之昔在唐虞鑒於天道舉其



黎獻授彼明哲雖復質文殊軌沿革不同歷代因循斯  
風靡替我大梁所以考庸太室接禮貳宮月正元日受  
終文祖但運不常夷道無恒泰山岳傾偃河海沸騰電  
目雷聲之禽鈎爪鋸牙之獸咀齧含生不知紀極二后  
英聖相仍在天六夷貪狡爭侵中國縣王都帝人懷干  
紀一民尺土皆非梁地朕以不造幼罹閔凶仰憑衡佐  
亟移年序周成漢惠邈矣無階惟是童蒙必貽顛蹶若  
使時無聖哲世靡艱難猶當高蹈於滄洲自求於泰伯

者矣惟王應期誕秀開籙握圖性道故其難聞嘉庸已  
其被物乾行同其燾覆日御比其貞明登承聖於復禹  
之功樹鞠子於興周之業滅陸渾於伊洛殲驪戎於鎬  
京大小二震之駭徒東南兩越之勅寇遽行天討無遺  
神策於是祖述堯舜憲章文武大樂與天地同和大禮  
與天地同節鼓之以雷霆潤之以風雨仁霑葦信及  
豚魚殷牖斯空夏臺虛設民惟大畜野有同人升平頌  
平無偏無黨固以雲飛紫蓋水躍黃龍東伐西征晻映

川陸榮光曖曖已冒郊廛甘露瀼瀼亟流庭苑車轍馬  
迹誰不率從蟠水流沙誰不懷德祥圖遠至非惟赤伏  
之符靈命昭然何止黃星之氣海口河目聖賢之表既  
彰握旄執鉞君人之狀斯偉且自攝提無紀孟陬殄滅  
枉矢宵飛天弧曉映久矣夷羊之在牧時哉蛟龍之出  
泉草運之兆咸徵惟新之符並集朕以欽若勛華屢迴  
星琯昔者木運斯盡予高祖受焉今歷去災精神歸樞  
紐敬以火德傳於爾陳遠鑒前王近謀羣辟明靈有悅

率土同心今遣使持節兼太保侍中尚書左僕射平樂  
亭侯王通兼太尉司徒左長史王瑒奉皇帝璽綬受終  
之禮一依唐虞故事王其時陟元后寧育兆民光闡洪  
猷以承昊天之休命

徐孝穆集卷六

欽定四庫全書薈要

徐孝穆集備考

吳江徐文炳增補

陳武帝即位詔

漢律歷志土生金故為金德金生水故為水德水生木  
故為木德木生火故為火德火生土故為土德漢劉  
向傳三統注張晏曰一曰天統謂周建子為正二曰地  
統謂殷建丑為正三曰人統謂夏建寅為正晉王尼  
傳尼常歎曰滄海橫流處處不安也任昉表千載一  
逢再造難答禮記大道之行也天下為公選賢與能  
書大誥若涉淵水

予惟往求朕攸濟

梁禪陳詔

班固典引經緯乾坤出入三光注三光日月星也 史

今出師頌渾一區字 秦始皇本紀更名民曰黔首應

劬曰黔亦黎黑也 左傳申包胥曰吳為封豕長蛇汙

食上國 陳武帝紀貞陽侯淵明即位改元天成 老子

天下神器不可以有為為者敗之 書七世之廟可以

觀德 左傳師曠對曰匱神乏祀易鼎君子以正位凝

命 公羊傳君若贅旒然 詩維嶽降神生甫及申

書民墜塗炭 後漢曹褒傳詔曰漢遭秦餘禮壞樂崩

世本西王母慕舜之德乃獻白環及珎 韓詩外傳

周公居攝二年制禮作樂天下和平越裳氏以三象重

譯而獻白雉 史記若煙非煙若雲非雲郁郁紛紛蕭

索輪囷是謂慶雲 魏文帝紀注甘露醴泉象瑞竝出

陳書武帝紀梁紹泰二年三月自去冬至是甘露頻降

於鍾山梅岡南澗及京口江寧縣境或至三數升大如

奕碁子 漢公孫弘策嘉禾興朱草生此和之至也

呂氏春秋虞舜卿雲歌曰卿雲爛兮紅縵縵兮日月光

華旦復旦兮 左傳晉文公請隧弗許曰王章也未有  
代德而有二王亦叔父之所惡也後漢竇融傳臣融有  
子年十五不得令  
觀天文見識記

陳公九錫詔

漢王莽傳張純等曰謹以六藝通義經文  
所見周官禮記宜於今者為九命之錫臣

請錫命

奏可

後漢張衡靈憲賦元氣剖判剛柔始分清濁異位天成  
於外地定於內又太素之前寂莫冥默不可為象班固  
典引太極之原兩儀始分煙煙氤氳 管子桓公九合  
諸侯一匡天下天子賞以渠門赤旂 左傳云天王出  
居于鄭僖公二十五年晉侯辭秦師而下三月甲辰次  
於陽樊右師圍溫左師逆王夏四月丁巳王入于王城  
取太叔于溫殺之於隰城戊午晉侯朝王王饗醴命之  
宥與之陽樊溫原攢茅之田晉於是始啟南陽 陳武

帝紀太平元年九月帝進封義興郡公二年八月帝進  
位太傅隋書揚州毗陵郡義興縣注舊曰陽羨置義興  
郡書乃聖乃神乃武乃文論語固天縱之將聖又  
天生德於予漢書項羽嘗攻襄城襄城無噍類窮  
牢未詳按董卓傳縱放兵士剽虜資物謂之搜牢注言  
牢固者皆搜索取之魏略侍中陳羣尚書桓階奏曰  
諸明圖緯者皆言漢行氣盡黃家當興殿下應期十分  
天下而有其九以服事虞木華海賦戲廣浮深劉  
向新序扶傷舉死履腸涉血陳武帝紀江寧令陳嗣等  
據姑孰不從帝命侯安都等討平之聚其首為京觀  
漢陳平傳天下指揮即定家語冠頌六合是式詩  
下武維周文選注三靈天地人也左傳衛太叔文  
子曰今寧子視君不如奕棊張協賦棊布星羅梁敬  
帝紀僧辯納貞陽侯淵明即偽位以帝為皇太子書金騰  
惟予沖人弗及知左傳齊陳乞弒其君荼鮑子曰汝  
忘君之為孺子牛而折其齒乎而背之也左傳衛子



鮮以公命與寧喜言公曰苟反政由寧氏祭則寡人  
班固諸侯王表有逃責之臺被竊鉄之言然天下謂之  
共主強大弗之欺傾陸機辯止論神兵東驅奮寡犯  
衆梁敬帝紀司空陳霸先襲殺王僧辯黜淵明而奉  
帝南史杜龕傳貞陽侯淵明以龕為震州刺史吳興太  
守龕僧辯婿也僧辯敗龕乃據吳興以拒之郗將杜泰  
降陳文帝龕尚醉不覺文帝斬之南史張彪少亡命  
為盜頗有郗曲王僧辯遇之甚厚引為爪牙與杜龕相  
似世謂張杜為東揚州刺史會僧辯見害時陳文帝已  
據震澤將及會稽彪將沈泰吳寶真等叛迎文帝彪遂  
敗走文帝遣劫殺之隋書揚州南海郡南海縣注舊  
分置番禺縣荊州九江郡潁城縣注有彭蠡湖左傳  
穀子曰命在養民死之長短時也尚書中候黃帝時  
鳳凰巢阿閣麒麟在囿蔡邕琴操周成王琴歌曰鳳凰  
翔兮紫庭抱朴子鳳頭上青戴仁足下黃蹈信呂氏  
春秋北方曰玄天淮南子古有整頭而卷領以王天

下繫辭黃帝堯舜垂衣裳而天下治 齊世家會諸侯  
 於葵丘周襄王使宰孔賜桓公文武胙彤弓矢大輅命  
 無拜左傳天王狩于河陽晉侯獻楚俘于王王策命晉  
 侯為侯伯賜之大輅之服戎輅之服彤弓一彤矢百玃  
 弓矢千拒鬯一白虎賁三百人 漢王陵傳平謝曰宰  
 相者上佐天子理陰陽順四時蕭曹傳贊二人同心遂  
 安海內 謝朓詩霸功興寓縣 周禮司勳掌六鄉賞  
 地之灋以等其功 舜典若稽古帝舜曰重華堯典釐  
 降二女于媯汭嬪于虞 左傳史趙曰盛德必百世祀  
 又卜偃曰公侯之子孫必復其始 周本紀古公亶父  
 復脩后稷公劉之業積德行義國人皆戴之堯典乃命  
 羲和欽若昊天太史公自序重黎氏世序天地 魏志  
 天子使魏公位在諸侯王上改授金璽赤紱遠遊冠後  
 漢輿服志遠遊冠制如通天有展筩橫之於前無山述  
 諸王所服也漢書諸侯王初帝初置金璽鑿綬如淳曰  
 鑿綠也晉灼曰鑿草名也似艾可染綠因以為綬名鑿

音庚 宋書州郡志順帝昇  
明元年改揚州刺史曰牧

### 進武帝為長城公詔

陳武帝紀元帝承制授帝征北大將軍開府儀同三司  
南徐州刺史進封長城縣公承聖三年三月進帝位司  
空隋書揚州頭郡領長城縣詳九錫文 左傳高陽氏  
有才子八人明允篤誠 漢張耳傳南有五嶺之戍注  
大庾始安臨賀桂陽揭陽也 陳武帝紀太清二年冬  
侯景寇逼帝將赴援遣杜僧明胡穎將二千人頓於嶺  
上并厚結始興豪傑同謀義舉 祭統衛孔悝之鼎銘  
悝拜稽首曰對揚以辟之勤大命施於蒸彝鼎 周禮  
司勳凡有功者銘書於王之太常 漢書高祖初起禱  
豐枌榆社樊噲傳噲曰始陛下與臣等起豐沛定天下  
何其壯也 後漢班超傳疏曰代馬依風 左傳趙穿  
怒曰裹糧坐甲固敵是求敵至不擊將何俟焉 晉漢

春秋氏池縣大柳谷口有蒼

石立水中其文曰大討曹

陳文帝登祚尊皇太后詔

陳后妃傳武宣章皇后諱要兒吳興烏程人本姓鈕父景

明幼為章氏所養因改焉武帝先娶同郡錢仲方之女  
早卒後乃聘后永定元年立為皇后武帝崩后密與中  
書舍人蔡景歷定計召文帝及即位尊后  
為皇太后宮曰慈訓太建二年崩諡曰宣

後漢明帝紀制曰朕以虛薄何以享斯南史衡陽獻

王昌字敬業武帝第六子也景平拜長城國世子吳興

太守魏克荆州與宣帝俱遷長安武帝即位頻遣使請

宣帝及昌周人許而未遣及武帝崩乃遣之時王琳作

梗中流昌不得還居於安陸天嘉元年封衡陽郡王入

境濟江於中流殞之使以溺告諡曰獻漢書代王今

張武等六人乘六乘傳詣長安皇甫謐高士傳許由字

武仲堯舜致天下而讓焉乃退而逃耕於中岳潁水之

陽箕山之下 晉書百僚稱上尊號中宗慨然流涕曰  
吾本琅邪王諸賢見逼不已乃呼私奴命駕將返國  
書洛誥周公拜手稽首曰朕復子明辟 左傳宋穆公  
疾召大司馬而屬殤公馬曰先君舍與夷而立寡人寡  
人弗敢忘若以大夫之靈得保首領  
以沒先君若問與夷其將何辭以對

封始興王詔

陳書始興王叔陵字子嵩高宗第二子  
也太建元年封始興郡王奉昭烈王祀

穀梁傳兄弟天倫也漢高帝紀六年以碭郡薛郡郟郡  
三十六縣立弟文信君交為楚王交高祖同父少弟也  
以雲中雁門代郡五十三縣立兄宜信侯喜為代王喜  
即仲也 周禮疏天子謂之帝系諸侯謂之世本詳登  
祚詔 國語蠻夷要服戎狄荒服 祭義霜露既降君  
子履之必有悽愴之心 商頌寢成孔安 說苑吾丘  
子擁鎌戴索而哭對孔子曰樹欲靜而風不定子欲養  
而親不在往而不來者年也不可再見者親也 後

漢地理志章陵故舂陵世祖更名明帝紀車駕從皇太后幸章陵觀舊廬陳宣帝紀光大二年十一月慈訓太后黜廢帝為臨海王以帝入繼皇統

隋書南海郡曲江縣注舊置始興郡

### 為陳武帝即位告天文

湯誥敢用玄牡敢昭告于天神后詩皇皇后帝左傳云天生民而立之君使司牧之蜀志譙周問杜瓊

曰昔周徵君羣以為當塗高者魏也其義何也瓊曰魏

闕名也當塗言高聖人取類言爾又周嘗書版示文王

曰典午忽兮月酉沒兮典午者謂司馬也月酉者謂八

月也至八月而司馬文王崩詳策文左傳伍員諫吳

子曰少康使女艾謀澆使季杼誘豷遂滅過戈復禹之

績祀夏配天不失舊物左傳楚子投袂而起易坤

靈圖至德之萌日月若連璧也漢天文志漢元年十

月五星聚於東井此高皇帝受命之符也纂要云五星

謂之五緯 魏文帝紀初漢熹平五年黃龍見譙太史  
令單颺曰其國後當有王者興不及五十年亦當復見  
陳武帝紀太平元年九月丁未中散大夫王彭牋稱今  
月五日平旦於御路見龍迹自大社至象闕亘三四里  
張衡靈憲賦地有九域山川貫誼過秦論有并吞八  
荒之心 左傳襄公十一年同盟于亳載書曰羣神羣  
祀 繫辭聖人之大寶曰位臯陶謨一日二日萬幾  
陳武帝紀梁帝遊於別宮帝謙讓再三羣臣固請乃許  
之 書成馮放桀  
于南巢惟有慙德

### 梁禪陳策文

三皇本紀自人皇已後有五龍氏燧人氏大庭氏柏皇  
氏中央氏卷須氏栗陸氏驪連氏赫胥氏尊盧氏混沌  
氏吳英氏有巢氏朱襄氏葛天氏陰康氏無懷氏蓋三  
皇以來有天下者之號 莊子容陳氏大庭氏結繩而

用之晉魏恒書勢黃帝之史沮誦蒼頡眺彼鳥迹始作書契古逸詩伯牙水僊操序山林宵冥書五子之

歌涼乎若朽索之馭六馬孟子舜視棄天下猶棄敝屣也逸士傳堯之讓許由也由以告巢父巢父曰汝

何不隱汝形藏汝光非吾友也乃擊其膺而下之許由悵然不自得乃遇清冷之水洗其耳拭其目日向者聞

言負吾友遂去終身不相見高士傳善卷者舜以天下讓之卷遂入溪山黃錄黃帝坐玄扈洛上與大司

馬容光左右輔周昌等百二十人臨觀鳳皇銜圖置帝前圖以黃金為柙書在璇璣玉衡以齊七政徐廣與服

志天子輅金根車竹書紀年舜設壇於河依堯故事至於下昞榮光休至黃龍負圖出於壇畔帝王世紀

後年二月堯率羣臣刻壁為書東沈洛水竹書紀年帝載歌曰襲乎鼓之軒乎舞之菁華已竭褰裳去之

書大禹謨帝曰格汝禹朕宅帝位三十有三載耄期倦于勤汝惟不怠總朕師尚書大傳十有四祀鍾石笙



筦變聲樂未罷疾風發屋天大雷雨帝沈首而笑曰明  
哉一人天下也乃見於鍾石尚書大傳謗然作大唐

之歌按南史本作謔非司馬相如封禪文晦昧昭晰

後漢獻帝紀建安二十五年三月改元延康冬十月

皇帝遜位魏王丕稱天子奉帝為山陽公魏志陳留王

咸熙二年二月使使者奉皇帝璽綬冊禪位於晉嗣王

如漢魏故事宋武帝紀晉琅邪王元熙二年六月禪位

於宋改元永初封晉帝為零陵王齊高帝紀宋順帝昇

明三年四月帝禪位於齊改元建元封宋帝為汝陰王

梁武帝紀齊和帝中興二年四月下詔禪位改元天監

封齊帝為巴陵王吳志賀齊傳齊曰殿下以神武應

期廓開玉業漢匈奴傳王室遂衰戎狄交侵泉古

暨字後漢宦者傳論魏武因之遂遭龜鼎老子聖

人在天下慄慄為天下渾其心注慄慄常恐怖也後漢

寒朗傳贊慄慄楚黎詳梁禪陳詔書百姓懍懍若崩

厥角書次五曰建用皇極東觀漢紀日角偃月相

之極貴晉書載紀慕容德額有日角偃月重文洛書黑  
帝子湯長八尺一寸珠庭 宋武帝紀桓玄妻劉氏謂

玄曰劉裕龍行虎步恐必不為人下

漢書宣帝紀昭

帝崩母嗣大將軍霍光請廢高后紀立恒山王弘為皇帝

壘綬光奏王賀淫亂請廢高后紀立恒山王弘為皇帝

大臣相與陰謀以為少帝及三弟為王者皆非孝惠子

復共誅之尊立文帝賈誼疏冠雖敵不以苴履 漢書

項氏畔換帥古曰畔換猶言跋扈也 書無遠弗屆

尚書大傳舜時蛟魚踴躍于其淵遷虞而事夏也 左

傳申須曰慧所以除舊布新也漢五行志董仲舒以為

此食又既象陽將絕夷狄主上國之象也 陳武帝紀

侯景登石頭城密謂左右曰此軍上有紫氣不易可當

又帝進軍頓西昌有黃龍見水濱 家語武王克商廟

慎氏貢楛矢石砮詳梁禪陳詔 老子聖人處上而民

不重處前而民不害是以天下樂推而不厭 左傳王

孫滿曰周卜世三十卜年七百漢劉向疏王者必通三

統明天命所授者博非獨一姓也  
南史阮孝緒傳齊為木行

# 陳公九錫文

尚書中候王至碯溪之水呂尚釣於崖王下拜尚荅曰  
得玉璜刻曰姬受命呂佐檢德來昌來提撰爾維鈴報  
在齊及佐周克殷封於齊吳越春秋禹案黃帝中經  
曰在九疑山東南天柱號曰委宛其書金簡青玉為字  
禹乃求之夢赤繡文衣男子自稱玄夷蒼水使者候禹  
令齋三日禹乃得書言治水之要老子侯王得一而  
天下正漢書陽九厄曰初入百六陽九禹貢至于  
碯石入于海孟子洪水橫流書大炎崑岡玉石俱焚  
漢書注師古曰丞韋國彭姓左傳秦伯西戎晉主  
東夏齊王融曲水詩序跨蹠昌姬漢酷吏傳序網漏  
於吞舟之魚詩內巽于中國覃及鬼方晉陸機功  
臣頌茫茫宇宙上塤下黷莊子圓臚方趾南史梁

武帝太清三年崩列仙傳軒轅自擇亡日與羣臣辭還  
葬橋山崩棺空惟有劍舄在棺焉南史簡文帝大

寶二年崩晉書漢主劉聰陷洛陽遷懷帝於平陽太子  
業即位於長安是為愍帝劉曜陷長安送帝於平陽皆

遇害華陽國志滇池縣有滇水周回二百里似如倒  
流故俗曰滇池山海經桂林有八樹在番禺東隋書

熙平郡桂嶺縣注舊曰興安開皇十八年改名恐非  
揚雄劇秦美新海水羣飛注喻大亂也淮南子堯使

羿殺窳窳斷修蛇擒封豨萬民大悅左傳楚子曰古  
者明王伐不敬取其鯨鯢而封之於是乎有京觀淮南

子曰睹於蒙谷之浦注蒙谷蒙汜之水也南史相東  
王繹承制授霸先交州刺史尋改南江州刺史與王僧

辯擊斬侯景殷本紀伊尹放太甲于桐宮漢金日  
碑傳莽何羅褒白刃從東廂上見日碑色變行觸寶瑟

僵日碑梓胡投何羅殿下得擒縛之公羊傳中國不  
絕若縊也戰國策王孫賈入市呼曰淖齒亂齊國殺

潘王欲與我誅之者袒右乃攻淖齒殺之求潘王子法  
章共立以為齊王保莒城以拒燕軍左傳齊侯使管  
夷吾平戎於王王以上卿之禮饗管仲南史西魏遣  
于謹入江陵執元帝霸先與王僧辯迎元帝子方智至  
建業承制齊遣高渙送淵明來主梁嗣僧辯納之以方  
智為太子霸先殺僧辯廢淵明復立方智是為敬帝  
南史孫回盧子雄討李賁衆潰而歸武林侯諮誣奏回  
等逗留賜死子雄弟子略及杜僧佑周文育等率衆攻  
廣州參軍陳霸先帥精甲三千擊破之釋僧佑文育為  
主帥國語吳晉會于黃池吳王赤旗赤羽之矰望之  
如火陸機漢高祖功臣頌胡馬洞開家語子路曰  
願得白羽若月赤羽若日左傳民逃其上曰潰魏  
王掣從軍詩所從神且武馬得久勞師南史武帝大  
同十年李賁自稱越帝置百官以霸先為交州司馬與  
交州刺史楊暕討賁賁敗奔嘉寧城復率衆出屯典澈  
湖霸先乘流先進賁衆大潰竄入屈獠洞屈獠斬賁賁

兄天寶收餘兵圍愛州霸先討平之陳書武帝紀十一年六月軍至交州賁衆數萬於蘇歷江口立城柵以拒官軍賁推高祖為前鋒所向推陷賁走典澈湖於屈獠

訛立砦

隋書揚州交趾郡注舊曰交州九真郡注梁

置愛州

漢書南海尉任囂病且死召龍川令趙佗行

南海尉事高祖定天下遣陸賈立佗為南粵王其後佗

乃自尊號南武帝

陳琳檄吳文跨州連郡有威有名

十有餘輩

未詳按通鑑黃門郎史淑自長安犇涼州

稱愍帝出降前一日使淑齎詔賜張寔拜涼州牧承制

行事先是長安謠曰秦川中血沒腕唯有涼州倚柱觀

及漢兵覆關中氐羌掠隴右雍秦之民死者什八九獨

涼州安全

權曰晉王諒傳初新昌太守梁碩自領交

趾晉地理志新昌郡吳置

宋州郡志越舊太守蘇

利長隋書交趾郡領嘉寧縣

左思魏都賦壘陬夷落

注陬聚也後漢南匈奴傳其大臣貴者左賢王次左

谷蠡王次右賢王次右谷蠡王謂之四角次左右日逐

王次左右温禺鞮王次左右斬將王是為六角皆單于子弟次第當為單于者也 陸機詩余固水鄉士 東方朔

神異經南荒之外有火山晝夜火然 廣州記馬援討平交趾於嶠南立銅柱以表漢之極界 晉書交州牧陶璜

上言交廣東西數千里不賓屬者六萬餘戶服官役纔五千餘家二州脣齒惟兵是鎮 後漢竇融傳贊王靈以宣

患 王少頭陀寺碑炎區九譯沙場一候注一候者言少邊周禮天府掌祖廟之守藏與其禁令 後漢百官志

大鴻臚掌諸侯及四方歸義蠻夷 晉劉琨傳琨枕戈待旦吳越春秋句踐反國飲食必嘗膽 漢高帝紀吾以布

衣提三尺劍取天下酷吏傳大將軍光因舉手自撫心曰使我至今病悖 淮南子鴻鵠背負青天膺摩赤霄 陸

機辨止論反帝座於紫闥 陳武帝紀侯景寇逼帝將赴援廣州刺史元景仲陰將圖帝帝與成州刺史王懷明等

馳檄以討景仲景仲縊於閣下帝迎蕭勃鎮廣州 易西南得朋 左傳韓宣子曰同惡相求如市賈焉 漢書父

老帥子弟殺沛令立高祖為沛公祠黃帝祭蚩尤於沛庭而饗鼓後漢光武紀光武初騎牛殺新野尉乃得馬

漢書貨殖傳桀黠奴人之所患隋書永安郡注後齊置衡州澧陽郡崇義縣注後周置衡州零陵郡營道縣注有九

疑山南史臨賀內史歐陽頔監衡州蘭裕京禮扇誘始興等十郡共攻頔霸先救之悉擒裕等仍監始興郡事并

厚結豪傑共謀義舉丘遲書魚遊于沸鼎之中漢李陵傳陵曰各鳥獸散猶有得脫歸報天子者左傳晉

州綽射殖綽中肩弛弓而自後縛之其右具丙亦舍丙而縛郭最皆衿甲面縛坐於中軍之鼓下後漢鄭弘

傳政有仁惠民稱蘇息陳武帝紀蔡路養起兵據南康時蕭勃鎮廣州遣腹心譚世遠為曲江令與路養相

結同遏義軍大寶元年帝發始興次大庾嶺大破路養軍進頓南康帝發南康瀨石舊有二十四灘灘多巨石

行旅以為難帝之發也水暴起數丈三百里間巨石皆沒隋書揚州南康郡雩都縣注舊廢平陳置南康縣注舊



曰灑 書武成為天下逋逃主萃淵藪 後漢公孫瓚  
傳兵法百樓不攻吾樓櫓千里食此穀足待天下之變  
墨子公輸般為雲梯以攻宋墨子解帶為城以牒為械  
輸般九攻墨子九拒 孫臏傳馬陵道狹而旁多阻隘  
可伏兵乃斫大樹白而書之曰龐涓死于此樹之下龐  
涓果夜至斫木下齊軍萬弩俱發涓乃自剄曰遂成孺  
子之名漢書淮南王安使陳喜枚赫作輶車 後漢何  
進傳主簿陳琳曰今將軍龍驤虎步高下在心此猶鼓  
洪爐燎毛髮耳 陳書武帝紀高州刺史李遷仕據大  
臯遣主帥杜平虜帥千人入灑石魚梁又南史李遷仕  
遣主帥杜平虜將兵逼南康陳霸先遣周文育擊走之  
據其城遷仕復擊南康霸先遣杜僧明等擒斬之 蜀  
志馬騰子超率諸戎以擊隴上郡縣據冀城吏民梁寬  
等閉城門乃奔漢中依張魯聞先主圍成都密書請降  
晉書流民四五萬家一時俱反以醴陵令杜弢為湘  
州刺史 李康運命論張良受黃石之符誦三略之說

注上中下三計

漢書陳平六出奇計

後漢段熲傳

張奐又言羌一氣

所生不可誅盡山谷廣大不可空靜

漢王溫舒傳溫舒為河內太守捕郡中豪猾相連坐

千餘家盡十二月郡中無犬吠之盜

漢書陳勝吳廣

聚叢祠中夜篝火狐鳴呼曰大楚興陳勝王

爾雅大

波為瀾小波為淪

左思吳都賦器械兼儲注兼儲蓄

積也

南史王僧辯乘勝下溫城霸先引兵三萬人發

南康進頓西昌會僧辯於溫城霸先有糧五十萬石分

三十萬以資僧辯于慶等皆棄城走

詩我庾維億

孟子簞食壺漿以迎王師

漢書宣帝紀大司農中丞

耿壽昌奏設常平倉以給北邊省轉漕溝洫志漕從山

東西歲百餘萬石更砥柱之艱敗亡甚多

漢武帝紀

舳艫千里注其船多前後相銜不絕又鄆食其傳夫教

倉天下轉輸久矣臣聞其下藏粟甚多

吳都賦戶有

犀渠注盾名詩貝冑朱綬

左傳王于虎盟諸侯於王

庭要言曰皆樊王室又師克在和不在衆

梁元帝立

覽賦 公鶴塞於淶陽 漢書沛公從百餘騎至鴻門謝

羽 左傳公子曰所不與舅氏同心者有如白水 後

漢書銅馬降蕭王輕騎入其營渠帥曰王推赤心置人

腹中安得不投服乎 南史湘東王命僧辯等東擊侯

景 舳舻數百里霸先卒甲士三萬舟艦二千自南江出

益口 會僧辯築壇歃血共讀盟文流涕慷慨 漢外戚

傳注師古曰肩短闕也 漢書匈奴有左賢王右賢王

左傳晉中行穆子敗無終及羣狄於太原為五陳以相

離兩於前伍於後專為右角參為左角偏為前拒以誘

之 漢龜錯傳匈奴之革筍木薦弗能支孟康曰木薦

以木版作如盾 漢匈奴傳自君王以下咸被旃裘

司馬相如上林賦 他他藉藉填阮滿谷 晉惠帝紀永

寧元年趙王倫篡位齊王冏起兵討倫成都王穎河間

王顥常山王乂新野公歆皆舉兵應之倫遣其將孫輔

出鄂坂以拒冏 左傳西鉏吾曰今將崇諸侯之姦而

披其地以塞夷庚 注夷庚吳晉往來之道也 南史侯

欽定四庫全書 徐孝穆集 十三

子鑿據姑孰南洲以拒西師僧辯等至子鑿帥步騎挑戰又以鷓船千艘載戰士僧辯麾細船皆退留大艦夾泊兩岸子鑿之衆謂水軍欲退徑出趨之大艦斷其歸路鼓譟大呼合戰江中子鑿大敗僅以身免左傳子犯曰表裏山河必無害也漢蒯通傳金城湯池不可攻也西京賦疏龍首以抗殿注龍首山名過秦論踐華為城博物志地有三千六百軸禮記軍容不入國後漢光武紀司隸官屬衣冠制度皆如舊儀父老舊吏見之莫不垂涕悲喜左傳白公勝作亂葉公至北門或遇之曰君胡不胄盜賊之矢若傷君是絕民望也乃胄而進又遇一人曰君胡胄國人若見君而是得父也乃免胄而進南史景兵敗入柵其將盧暉略以石頭降僧辯入據之景與霸先殊死戰衝陣不動景衆大潰南史齊將潘樂侵梁圍秦郡霸先與戰破之斬首萬餘級晉書鮮卑東胡種名齊神武帝紀神武既累世北邊故習其俗遂同鮮卑漢書注且渠當戶內

奴官名 漢李廣傳上使中貴人從廣服虔曰內臣之

貴幸者魏志梁習傳名王稽顙 左傳司馬侯曰冀之

北土馬之所生晉劉琨傳中夜奏胡笳賊皆流涕 左

傳逢丑父與公易位將及華泉駢絰於木而止 左傳

戰於韓原晉戎馬還寧而止 左傳襄十四年衛孫林

父甯殖出其君衍二十六年甯喜弑其君剽 左傳疆

場無主則啟戎心 南史廣陵喬人朱盛等潛聚黨謀

襲殺齊刺史溫仲邕遣使求援霸先因進軍圍廣陵齊

主來告曰請釋廣陵之圍必歸廣陵歷陽兩城霸先引

兵還京口江北之民從之濟江者萬餘口 孫盛晉陽

秋秦始皇時望氣者言五百年後金陵之地有天子氣

於是改金陵曰秣陵 晉書諸葛亮造八陣圖 左傳

齊惠崇高之難公使王黑以靈姑鉦率諸斷三尺馬而

用之 左傳乘丘之役公以金僕姑射南宮長萬 漢

書李廣曰吾為隴西守羌常反吾誘降者八百餘人詐

而同日殺之 南史譙秦刺史徐嗣徽南豫州刺史任

約襲建康不克入於石頭以叛十一月齊遣兵援之霸先及齊人戰敗之嗣徽約奔齊說苑談叢篇臬逢鳩

臬曰我將東徙鳩曰何故臬曰鄉人皆惡我鳴以故東

徙鳩曰子能更鳴可矣不能更鳴東徙猶惡子聲左

傳富辰曰狄固貪惓左傳楚子文曰諺曰狼子野心

漢西域傳公主歌曰穹廬為室兮旃為牆漢高帝紀

蕭何治未央宮立東闕北闕前殿漢書帝得烏孫馬

好名曰天馬晉書周訪討杜曾使李桓督左甄許朝

督右甄東京賦鶴鶴魚麗箕張翼舒爾雅彗星為

櫬槍詩薄伐獫狁左傳獲長狄僑如埋其首於子

駒之門漢書李陵衛律皆胡服椎結白起傳趙括

軍敗卒四十萬人降起乃挾詐盡阮殺之漢高帝紀

羽敗漢兵濰水上水為之不流易鼎折足左傳工

尹路請曰君王命剥圭以為鉞秘敢請命詩鉦人伐

鼓說文云鉦鏡也似鈴柄中上下通所以止鼓魏畧

王凌自知罪重試索棺釘以觀太傅意太傅給之遂自

殺左傳許男面縛銜璧大夫衰經士與櫬楚子焚其櫬禮而命之後漢光武紀誅王郎叔文書得吏人與

郎文闖謗毀者數千章光武燒之曰令反側子自安

南史前青州刺史程靈洗率兵救僧辯力戰軍敗久之

乃降霸先義之左傳隱公四年衆仲曰州吁阻兵而

安忍左傳子桑曰史佚有言曰無始禍無怙亂無重

怒揚子洪荒之世詳梁禪陳文左傳呂相絕秦曰

度劉我邊陲南史霸先吳興長城下若里人自云漢

太丘長寔之後左思蜀都賦揚雄含章而挺生詩

維桑與梓必恭敬止尚書元惡大憝老子治大

國如烹小鮮南史杜龕據吳興以叛霸先表自東討

仍還都命周文育進討龕龕以城降誅之後漢光武

紀五校賊帥高扈袁紹傳紹擊賊劉石青牛角黃龍左

校郭大賢李大目于氏根等魏陳琳檄吳文七國之

兵瓦解冰泮水經注會稽山東有剗去禹廟七里深

不見底謂之禹井劉獻定軍禮吳王夫差啟蛇門以

厭越人越為雷門以襪之擊大鼓於雷門之下而蛇門  
聞焉南史東揚州刺史張彪圍臨海太守王懷振於  
剡巖霸先遣兄子猜周文育襲會稽討彪若邪村人斬  
彪傳首建業漢吳王濞傳以爰盎為泰常使吳王聞  
爰盎來笑而應曰我已為東帝尚誰拜晏子春秋不  
出尊俎之間折衝千里之外寇恂賈復光武功臣樊  
噲滕公夏侯嬰高帝功臣漢書武帝有下瀨將軍  
說文揃搃也書盤庚其猶可撲滅周禮甸師王之同  
姓有罪則死刑焉後漢馬援傳交趾女子徵則徵貳  
反拜援為伏波將軍大破之封新息侯南史蕭勃起  
兵於廣州遣歐陽頔及其將傅泰蕭孜為前軍南江州  
刺史余孝頃以兵會之霸先命周文育由問道兼行據  
頔及孜泰孝頃之間築城饗士頔等大駭文育遣周鐵  
虎等襲頔擒之文育盛陳兵甲與頔乘舟而宴巡蹠口  
城下使其徒丁法洪攻泰擒之孜孝頃退走勃軍聞之  
恂懼遂殺勃隋書揚州豫章郡豫章縣注舊置豫章



郡左傳太叔完聚繕甲兵隋書揚州南海郡注舊

置廣州梁陳並置督府漢書武帝時南粵相呂嘉反

秋命衛尉路博德為伏波將軍討之得嘉為臨蔡侯又

吳王濞兵敗亡走東越東越縱殺吳王盛其頭馳傳以

聞魏文帝紀帝聞備兵東下與權文戰樹柵連營七

百餘里謂羣臣曰豈有七百里營可以拒敵者乎孫權

上事今至矣後七日破備書到南史周文育送顏等

於建康霸先釋而厚待之攷孝頃猶據石頭多設船艦

夾水而陣霸先遣侯安都助文育擊之安都潛師燒其

船艦水陸攻之攷出降孝頃逃歸霸先以顏聲著南土

復以為衡州刺史使討嶺南未至其子紇已克始興顏

至諸郡皆降遂克廣州淮南子九州之外有八埏八

埏之外有八紘八紘之外有八極鮑照蕪城賦出入

三代五百餘載竟瓜剖而豆分魏志注令曰設使國

家無有孤不知當幾人稱帝幾人稱王魏略王凌面

縛水次曰卿持折簡召我我何敢不至而乃引兵來乎

司馬宣王曰以卿非折簡可呼故也晉陽秋劉弘為荊州刺史咸曰得劉公一紙書賢於十部從事也淮南

子曰日出於暘谷浴於咸池西域傳無雷國王治廬城

去長安九千九百五十里淮南子凡海外三十六國

自西北至西南方有女子民丈夫民山海經丈夫國在

維鳥北其為人衣冠帶劍南史齊永元元年扶桑國有

沙門慧深來云扶桑東千餘里有女國二三月競入水

則任娠六七月產子女人胸前無乳頂後生毛根白毛

中有汁以乳子百日能行三四年則成人漢司馬相

如傳匈奴單于怖駭交臂受事屈膝請和穆天子傳乃

膜拜而受注今之胡人禮佛舉手加額稱南膜者即此

也漢書宣帝甘露二年匈奴呼韓邪款五原塞願奉

國珍朝南史敬帝太平二年領軍將軍徐度燒齊船

舶三千艘夏四月齊遣使通和漢張良傳沛公入秦

宮殿帷帳狗馬重寶婦女以千數欲留居之晉王延

壽魯靈光殿賦序靈光巋然獨存趙世家武靈王呂

樓緩謀曰吾欲胡服莊子趙太子悝謂莊周曰吾主所見劍士皆縵胡之纓漢王莽傳莽好厚履高冠以薳

裝衣尚書大傳微子朝周過殷故墟見麥秀之蕪蕪

兮禾黍之蠅蠅也曰此故父母之國乃為麥秀之歌

詩彼黍離離南史侯景東奔王克開臺城門引表之橫

入宮是夜遺燼燒太極殿及東西堂延閣祕署皆盡羽

儀輦輅莫有孑遺書太甲先王昧爽丕顯坐以待旦

淮南子曰經於泉隅是謂高春書無逸文王自朝至于

日中昃不遑暇食用咸和萬民漢鄒陽傳孝文皇帝據

闕入立寒心銷志不明求衣泰始晉武帝年號永平

東漢明帝年號南史敬帝太平元年起雲龍神武門

二年繕廟堂供備祀典漢王吉傳毆一世之民躋之

仁壽之域老子上德不德是以有德詩敦彼行葦

牛羊勿踐履蔡邕獨斷黃帝樂曰雲門堯樂曰咸池

漢書倚頓用監鹽起與王者埒富揚雄太玄紫霓

為雲晉張華傳妙達緯象左傳楚子使與師言管

仲對曰賜我先君履東至於海西至於河南至於穆陵  
北至於無棣又吳公子札來聘為之歌齊曰美哉泱泱  
乎大風也哉表東海者其太公乎又衆仲曰胙之土而  
命之氏又子犯曰求諸侯莫如勤王又展喜對曰昔周  
公太公股肱周室夾輔成王詩王命召虎式辟四方  
三皇本紀女媧鍊五色石以補天斷鼇足以立四極  
聚蘆灰以止滔水淮南子禹鑿龍門平水土民乃得  
而陸處後漢謝弼傳爵賞之設必酬庸勲後漢章  
帝八王傳仰恃明主垂拱受成隋書揚州淮南郡注  
舊曰豫州梁曰南豫州廬江郡注梁置南豫州宣城郡  
注舊置南豫州淮南郡安豐縣注梁置陳留安豐二郡  
丹陽郡江寧縣注梁置丹陽郡及南丹陽郡陳省南丹  
陽郡宣城郡宣城縣注舊曰宛陵置宣城郡丹陽郡注  
自東晉已後置郡曰揚州吳郡烏程縣注舊置吳興郡  
會稽郡注梁置東揚州陳初省遂安郡雒山縣注舊置  
新安郡信安郡新興縣注梁置新州新寧郡宋書州郡

志晉安帝始分淮北為北徐淮南猶為徐州後又以幽冀合徐青并合充武帝永初二年加徐州曰南徐而淮北但曰徐文帝元嘉八年更以江北為南充州江南為南徐州治京口割揚州之晉陵兗州之九郡僑在江南者屬焉故南徐州備有徐充幽冀青并揚七州郡邑隋書荊州九江郡注舊置江州揚州鄱陽郡鄱陽縣注舊置鄱陽郡臨川郡臨川縣注舊置臨川郡漢齊懷王傅小子閔受茲青社張晏曰王者以五色土為大社封四方諸侯各以其方色土與之苴以白茅歸以立社燕世家成王時召公為三公自陝以西召公奭主之自陝以東周公旦主之左傳鄭武公莊公為平王卿士桓公曰我周之東遷晉鄭焉依南史王瑒字子瑛梁元帝時位太子中庶子陳武帝入輔以為司徒左長史漢文帝紀與郡守為銅虎符竹使符應劭曰銅虎符第一至第五國家當發兵遣使者至郡合符符合乃聽受之竹使符者以竹箭五枚長五寸鐫刻篆書第一至

第十 管子禮義廉恥國之四維 周禮天官冢宰以  
八柄詔王馭羣臣 漢王莽傳鸞路乘馬戎路乘馬注

師古曰鸞路路車之施鸞者也四馬曰乘戎路戎車也  
漢王莽傳袞冕衣裳句履注孟康曰今齊祀履烏頭

飾也出履二寸 漢丙吉傳吉曰三公調和陰陽 文  
選潘勗魏公九錫文注軒縣諸侯樂也 左傳隱公始

用六佾 周禮鞮鞻氏掌四夷之樂又象胥氏掌蠻夷  
閩貉戎狄之國 漢王莽傳朱戶納陛注師古曰尊者

不欲露而升陛故納之於雷下也 文選注朱戶天子禮  
也 史記蔡澤傳不出廊廟 書光被四表 文選注虎

賁言其猛也皆百夫長 堯典象恭滔天 左傳無或  
如臧孫紇干國之紀 漢王莽傳左建朱鉞右建金戚

注師古曰鉞戚皆斧屬 漢王莽傳彤弓矢盧弓矢注  
師古曰彤赤色盧黑色茲音盧 孝經夫孝天之經也

地之義也 祭義春雨露既濡君子履之必有怵惕之  
心如將見之詳封始興王詔 漢王莽傳拒皂二直圭

贊二注師古曰鉅鬯香酒也卣中尊也  
以圭為勺末書說命格于皇天

### 陳武帝下州郡璽書

詩天降喪亂晉佛圖澄傳劉載已死載從弟曜篡襲  
偽位後漢書獻帝興平二年三月李傕脅帝幸其營  
赫宮室郭汜攻李傕矢及御前明年正月改元建安  
晉書懷帝永嘉五年劉聰使呼延晏等陷洛陽遷帝  
於平陽遇害周本紀命南宮括史佚展九鼎寶玉  
周禮冬至祀天於圓丘晉王濬傳設宿部分行有次  
第陳武帝紀永定元年冬十月乙亥皇帝即位於南郊  
柴燎告天先是氛霧雨雪晝夜晦冥至是日景氣清晏  
管子盛魄重輪六合俱照非日月能乎呂氏春秋水  
之美者有三危之露漢書太初歷晦朔弦望皆最密  
日月如合璧詳梁禪陳詔左傳鄭國  
多盜取人於萑蒲之澤書戎商必克

# 梁禪陳璽書

書萬邦黎獻

電目雷聲未詳按帝王世紀黃帝於東

海流波山得奇獸狀如牛蒼身無角能走出入水則風

雨目光如日月其音如雷黃帝殺之以其皮為鼓聞五

百里神異經窮奇鋸牙鉤爪遇忠信之人則噬而食

之魏略侍中陳羣尚書桓階奏曰尺土一民皆非漢

有佐助期漢以蒙孫亾說者以蒙孫漢二十四帝童

蒙昏愚以弱亾高士傳舜以天下讓支伯支伯遂不

知所之張衡東京賦高祖膺籙受圖左傳僖公二

十五年秋秦晉遷陸渾之戎於伊左傳晉伐驪戎

注杜預曰驪戎在京兆新豐縣漢書中山王勝對曰

文王拘於牖里張衡東京賦治致升平之德漢王莽

傳策羣司曰赤焯頌平考聲以律詩零露瀼瀼論衡

甘露味如蜜王者太平之應左傳楚子革曰昔穆王

欲肆其心周行天下皆將必有車轍馬迹焉史記顯



項紀北至幽陵南至交趾西至流沙東至蟠木動靜之物小大之神莫不砥屬後漢光武紀同舍生疆華奉

赤伏符至曰劉秀發兵捕不道魏志太祖武皇帝沛國

譙人諱操字孟德初桓帝時有黃星見於楚宋之分遼

東殷墟善天文言後五十年當有真人起於梁沛之間

至是而公始起孝經援神契孔子海口含海劉峻辨

命論河目龜文公侯之相屈原離騷攝提貞於孟陬

注攝提星名隨斗柄以指十二辰者也正月為陬天宮

書項羽拔鉅鹿枉矢西流天狼下有四星曰弧合誠圖

曰弧主司兵兵弩象也淮南子本經訓夷羊在牧注

許慎曰夷羊土神商之將止見於商郊牧野之地書

經援神契德至淵泉則黃龍見袁宏漢紀獻帝詔曰

炎精之數既終行運在乎曹氏通考自魏以後始有

九品之制以辨官位之高卑北魏以九品分正從梁分

十八班諸亭侯

十班詳九錫文

徐孝穆集備考

本傳

徐陵字孝穆東海郟人也祖超之齊鬱林太守梁員外散騎常侍父摛梁戎昭將軍太子左衛率贈侍中太子詹事謚貞子母臧氏嘗夢五色雲化而為鳳集左肩上已而誕陵焉時寶誌上人者世稱其有道陵年數歲家人攜以候之寶誌手摩其頂曰天上石麒麟也光宅惠雲法師每嗟陵早成就謂之顏回八歲能屬文十二通莊老義既長博涉史籍縱橫有口辨梁普通二年晉安

王為平西將軍寧蠻校尉父擒為王諮議王又引陵參

寧蠻府軍事大通二年王立為皇太子東宮置學士陵

充其選稍遷尚書度支郎出為上虞令御史中丞劉孝

儀與陵先有隙風聞劾陵在縣贓汙因坐免久之起為

南平王府行參軍遷通直散騎侍郎梁簡文在東宮撰

長春殿義記使陵為序又令於少傅府述所製莊子義

尋遷鎮西湘東王中記室參軍太清二年兼通直散騎

常侍使魏魏人授館宴賓是日甚熱其主客魏收嘲陵

曰今日之熱當由徐常侍來陵即荅曰昔王肅至此為  
魏始制禮儀今我來聘使卿復知寒暑收大慙及侯景  
寇京師陵父搞先在圍城之內陵不奉家信便蔬食布  
衣若居憂恤會齊受魏禪梁元帝承制於江陵復通使  
於齊陵累求復命終拘留不遣陵乃致書於僕射楊遵  
彥遵彥竟不報書及江陵陷齊送貞陽侯蕭淵明為梁  
嗣乃遣陵隨還太尉王僧辯初拒境不納淵明往復致  
書皆陵辭也及淵明之入僧辯得陵大喜接待餽遺其

禮甚優以陵為尚書吏部郎掌詔誥其年高祖率兵誅僧辯仍進討韋載時任約徐嗣徽乘虛襲石頭陵感僧辯舊恩乃往赴約及約等平高祖釋陵不問尋以為貞威將軍尚書左丞紹泰二年又使於齊還除給事黃門侍郎祕書監高祖受禪加散騎常侍左丞如故天嘉初除太府卿四年遷五兵尚書領大著作六年除散騎常侍御史中丞時安成王頊為司空以帝弟之尊勢傾朝野直兵鮑叔叡假王威權抑塞辭訟大臣莫敢言者陵

聞之乃為奏彈導從南臺官屬引奏案而入世祖見陵  
服章嚴肅若不可犯為斂容正坐陵進讀奏版時安成  
王殿上侍立仰視世祖流汗失色陵遣殿中御史引王  
下殿遂劾免侍中中書監自此朝廷肅然天康元年遷  
吏部尚書領大著作陵以梁末以來選授多失其所於  
是提舉綱維綜覈名實時有冒進求官諠競不已者陵  
乃為書宣示自是眾咸服焉時論比之毛玠廢帝即位  
高宗入輔謀黜異志者引陵預其議高宗纂歷封建昌

縣侯邑五百戶太建元年除尚書右僕射二年遷尚書左僕射陵抗表推周宏正王勣等高宗召陵入內殿曰卿何為固辭此職而舉人乎陵曰周宏正從陛下西還舊藩長吏王勣太平相府長史張種帝鄉賢戚若選賢與舊臣宜居後固辭累日高宗苦屬之陵乃奉詔及朝議北伐高宗曰朕意已決卿可舉元帥衆議咸以中權將軍淳于量位重共署推之陵獨曰不然吳明徹家在淮左悉彼風俗將略人才當今亦無過者於是爭論累



日不能決都官尚書裴忌曰臣同徐僕射陵應聲曰非但明徹良將裴忌即良副也是日詔明徹為大都督令忌監軍事遂克淮南數十州之地高宗因置酒舉杯屬陵曰賞卿知人陵避席對曰定策出自聖衷非臣之力也其年加侍中餘並如故七年領國子祭酒南徐州大中正以公事免侍中僕射尋加侍中給扶又除領軍將軍八年加翊右將軍太子詹事置佐史俄遷右光祿大夫餘並如故十年重為領軍將軍尋遷安右將軍丹陽

尹十三年為中書監領太子詹事給鼓吹一部侍中將軍右光祿中正如故陵以年老累表求致仕高宗亦優之乃詔將作為造大齋令陵就第攝事後主即位遷左光祿大夫太子少傅餘如故至德元年卒時年七十七詔曰慎終有典抑乃舊章令德可甄諒宜追遠侍中安右將軍左光祿大夫太子少傅南徐州大中正建昌縣開國侯陵弱齡學尚登朝秀穎業高名輩文曰詞宗朕近歲承華特相引狎雖多臥疾方期克壯奄然殞逝震

悼於懷可贈鎮右將軍特進其侍中左光祿鼓吹侯如  
故并出舉哀喪事所須量加資給謚曰章陵器局深遠  
容止可觀性又清簡無所營樹祿俸與親族共之太建  
中食建昌邑邑戶送米至於水次陵親戚有貧匱者皆  
令取之數日便盡陵家尋致乏絕府僚怪而問其故陵  
云我有車牛衣裳可賣餘家有可賣不其周給如此少  
而崇信釋教經論多所精解後主在東宮令陵講大品  
經義學名僧自遠雲集每講筵商較四座莫能與抗目

有青睛時人以為聰慧之相也凡有陳創業文檄軍書及禪授詔策皆陵所製而九錫尤美為一代文宗亦不以此矜物未嘗詆訶作者其於後進之徒接引無倦世祖高宗之世國家有大手筆皆陵草之其文頗變舊體緝裁巧密多有新意每一文出手好事者已傳寫成誦遂被之華夷家藏其本後逢喪亂多散失存者三十卷

有四子儉

南史儉一名報陳書云儉一名衆非

份儀傳

謹案卷六第一頁後二行顧惟菲德刊本德訛薄  
據陳書武帝紀改

第三頁後六行堯台禹佐刊本台訛治據陳書武  
帝紀改

第四頁前七行中外成平刊本成訛咸據陳書武  
帝紀改

第六頁後四行第二皇子叔陵刊本叔訛升據陳  
書始興王傳改

第七頁後一行且協謳歌刊本歌訛訟據陳書武  
帝紀改

第七頁後五行升壇受禪刊本受訛告據陳書武  
帝紀改

第八頁後二行徽徽皇極刊本徽徽訛微微據陳  
書武帝紀改

第九頁前一行下漏淵泉刊本淵訛深據陳書武  
帝紀改

第九頁後八行跨踉于齊晉刊本齊訛秦據陳書  
武帝紀改

第十頁前六行屠猳窳于中原刊本窳訛猳據淮  
南子及陳書改

第十五頁前一行多歷歲時刊本多訛各據陳書  
武帝紀改

第十六頁後八行金虎符刊本虎沿唐諱作獸據  
陳書武帝紀改

第十八頁後四行徐門浪泊刊本門訛聞據陳書

武帝紀改

備考第一頁後二行貞陽侯淵明刊本脫淵字據

陳書武帝紀增

第一頁後七行梁紹泰二年刊本泰訛興據梁書

敬帝紀改

第三頁後四行掌六鄉賞地之澹刊本鄉訛御據

周禮改



第四頁前五行遣杜僧明胡頴將二千人刊本頴  
訛欸據陳書武帝紀改

第四頁後八行皇甫謐高士傳刊本皇甫謐訛作  
魏隸又字武仲訛作仲武據叢書本改

第五頁前四行封始興王詔注陳書始興王叔陵  
字子嵩高宗第二子也太建元年封始興郡王  
奉昭烈王祀刊本誤引南史文帝即位封伯茂  
為始興王按前詔中明云叔陵又按太建元年

徐陵除尚書右僕射則此詔為封叔陵無疑今  
據陳書叔陵傳改

第十頁後八行帝之發也刊本脫也字據陳書武  
帝紀增

第十二頁後四行踐華為城刊本踐訛斬據文選  
改

第十三頁後七行工尹路請曰刊本工訛公據左  
傳改


第十五頁後五行交臂受事屈膝請和刊本訛作  
屈膝受之交臂請和據漢書改

第十六頁後七行自東晉已後置郡曰揚州刊本  
郡訛宋據隋書地理志改

第十六頁後八行信安郡刊本安訛都據隋書地  
理志改

第十八頁前五行晉王濟傳刊本訛作王濟傳據  
晉書改

金  
史  
卷  
之  
二  
本傳第四頁前五行七年刊本七訛十據陳書改



總校官庶吉士臣侍朝

校對官庶吉士臣徐立綱

謄錄監生臣范櫛